

Ո Ր Ո Շ ՈՒ Մ թիվ 61
վարչական տույժ նշանակելու մասին

«30» մարտի 2022թ.

ք. Սիսիան

Ես՝ Հայաստանի Հանրապետության պետական եկամուտների կոմիտեի Հարավային մաքսատուն-վարչության պետի ԺԹՊ Արտաշես Ղամբարյանս, քննելով իրանի Իսլամական Հանրապետության քաղաքացի Ալի Համիդի Էսգանդարի Օնգուտի (անձնագիրը՝ Z46721463) կողմից մաքսային կանոնների խախտում կատարելու վերաբերյալ նյութերը,

Պ Ա Ր Զ Ե Ց Ի

2022 թվականի հունվարի 30-ին ՀՀ ՊԵԿ Հարավային մաքսատուն-վարչության աշխատակիցները Մեղրիի մաքսային կետ-բաժնի տարածքում զննության են ենթարկել ԻԻՀ-ից ՀՀ ժամանած, քաղաքացի Ալի Համիդի Էսգանդարի Օնգուտի կողմից շահագործվող «MAZ» մակնիշի, 93A733-10 պետհամարանիշի տրանսպորտային միջոցը, ինչի արդյունքում տրանսպորտային միջոցի խցիկի վարորդի նստատեղի ետնամասի կողային պաստառի միջից՝ ապրանքների հայտնաբերումը դժվարացնող հանգամանքներում, հայտնաբերվել է մաքսային հսկողությունից թաքցված 50 բլոկ (500 տուփ) COBRA գրառմամբ ծխախոտ, թվով 30 հատ որովայնի գոտի, 4 բլոկ (12 հատ) անթև բլուզ, թվով 7 հատ կանացի տաբատ, 4 բլոկ (12 հատ) գուլպա:

Փաստի առթիվ վարորդ ԻԻՀ քաղաքացի Ալի Համիդի Էսգանդարի Օնգուտի նկատմամբ ՀՀ մաքսային օրենսգրքի 201-րդ հոդվածի հատկանիշներով հարուցվել է մաքսային կանոնների խախտման վերաբերյալ վարույթ, իսկ իրավախախտման անմիջական օբյեկտ համարվող վերոնշյալ ապրանքներն ի պահ է հանձնվել Մեղրիի մաքսային կետ-բաժնի մաքսային հսկողության տարածքում:

Վարչական վարույթի շրջանակներում մաքսային հսկողությունից թաքցված 50 բլոկ (500 տուփ) COBRA գրառմամբ ծխախոտի շուկայական արժեքը պարզելու նպատակով 01.02.2022 թվականին նշանակվել է ապրանքագիտական փորձաքննություն, որի կատարումը հիմք ընդունելով ՀՀ ՊԵԿ-ի և ՀՀ ԱՆ «Փորձագիտական կենտրոն» ՊՈԱԿ-ի միջև առկա պայմանագիրը՝ հանձնարարվել է «Փորձագիտական կենտրոն» ՊՈԱԿ-ին:

Վարչական վարույթի շրջանակներում թիվ 15 և թիվ 81 մտից համարների զեկուցագրերով հարցումներ են կատարվել ՀՀ ՊԵԿ Հարավային մաքսատուն-վարչության համապատասխան ստորաբաժանմանը՝ ճշտելու վերոնշյալ ապրանքների մաքսային արժեքները և վճարման ենթակա մաքսային վճարների չափերը:

ՀՀ ՊԵԿ Հարավային մաքսատուն-վարչության թիվ 67 և թիվ 89 մտից համարների տեղեկանքների համաձայն՝ 2022թ հունվարի 30-ի դրությամբ «բացթողում ներքին ապառման համար» մաքսային ընթացակարգով հայտարարագրելու դեպքում 50 բլոկ (500 տուփ) COBRA գրառմամբ ծխախոտի, թվով 30 հատ որովայնի գոտու, 4 բլոկ (12 հատ) անթև բլուզի, թվով 7 հատ կանացի տաբատի, 4 բլոկ (12 հատ) գուլպայի մաքսային արժեքը կկազմի 333175 ՀՀ դրամ:

ԵՏՄ մաքսային օրենսգրքի 2-րդ հոդվածի 1-ին մասի 25-րդ կետի համաձայն՝ «Միության մաքսային սահմանով ապրանքների անօրինական տեղափոխում» է համարվում ապրանքների տեղափոխումը Միության մաքսային սահմանով այն վայրերից դուրս,

որոնցով, սույն Օրենսգրքի 10-րդ հոդվածին համապատասխան, պետք է կամ կարող է իրականացվել ապրանքների տեղափոխում Միության մաքսային սահմանով, կամ այդ վայրերում գտնվող մաքսային մարմինների աշխատանքային ժամանակից դուրս, կամ մաքսային հսկողությունից թաքցնելու կամ ապրանքների ոչ հավաստի հայտարարագրման կամ չհայտարարագրման կամ ապրանքների վերաբերյալ ոչ հավաստի տեղեկություններ պարունակող փաստաթղթեր օգտագործելու միջոցով և (կամ) նույնականացման՝ կեղծ կամ այլ ապրանքներին վերաբերող միջոցներ օգտագործելու միջոցով:

ՀՀ մաքսային օրենսգրքի 189-րդ հոդվածի 1-ին և 2-րդ մասերի համաձայն՝ մաքսային կանոնների խախտում է համարվում անձի կողմից կատարված անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության մաքսային սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենսգրքով նախատեսված է պատասխանատվություն: Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

ՀՀ մաքսային օրենսգրքի 201-րդ հոդվածի համաձայն՝ Հայաստանի Հանրապետության մաքսային սահմանով ապրանքների տեղափոխումը՝ մաքսային հսկողությունից թաքցնելով, այսինքն՝ գաղտնարանների օգտագործմամբ, ապրանքների հայտնաբերումը դժվարացնող այլ եղանակներով կամ ապրանքներին այլ տեսք տալու միջոցով՝ հանցագործության հատկանիշների բացակայության դեպքում՝ առաջացնում է տուգանքի նշանակում՝ այդ ապրանքների մաքսային արժեքի չափով:

ՀՀ մաքսային օրենսգրքի 219-րդ հոդվածի համաձայն՝ մաքսային կանոնների խախտման վերաբերյալ գործը քննվում է վարչական պատասխանատվության ենթարկվող անձի մասնակցությամբ: Գործը կարող է քննվել նաև տվյալ անձի բացակայության դեպքում, եթե քննության տեղի ու ժամանակի մասին սահմանված կարգով նրան տեղյակ է պահվել, սակայն վերջինիս կողմից որևէ միջնորդություն չի հարուցվել, կամ եթե անձը բացակայում է, և հայտնի չէ նրա գտնվելու վայրը, կամ եթե նա գտնվում է Հայաստանի Հանրապետության սահմաններից դուրս:

Վարչական վարույթի շրջանակներում հարցում է կատարվել ՀՀ Ոստիկանության անձնագրային և վիզաների վարչությանը նպատակ ունենալով պարզել քաղաքացի Ալի Համիդի Էսգանդարի Օնգուտի վերջին հաշվառման վայրը:

ՀՀ Ոստիկանության անձնագրային և վիզաների վարչությունը տրամադրել տեղեկատվություն առ այն, որ քաղաքացի Ալի Համիդի Էսգանդարի Օնգուտի վերաբերյալ բնակչության պետական ռեգիստրի պահոցում տեղեկություն չկա:

Քաղաքացի Ալի Համիդի Էսգանդարի Օնգուտի սահմանահատումների պատմությունը ստանալու նպատակով հարցում է կատարվել ՀՀ ՊԵԿ Ներքին անվտանգության վարչությանը:

Ի պատասխան հարցման ՀՀ ՊԵԿ Ներքին անվտանգության վարչությունը տրամադրել է սահմանահատումների վերաբերյալ տեղեկատվություն, համաձայն որի քաղաքացի Ալի Համիդի Էսգանդարի Օնգուտին 25.03.2022 թվականին ժամը 20:31-ին Մեղրիի մաքսային կետ-բաժնով անցել է ԻԻՀ:

Քաղաքացի Ալի Համիդի Էսգանդարի Օնգուտի 2022 թվականի մարտի 30-ին հրավիրվել է ՀՀ ՊԵԿ Հարավային մաքսատուն-վարչություն՝ իր նկատմամբ ՀՀ մաքսային օրենսգրքի

201-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս պատշաճ ծանուցված լինելով հանդերձ չի ներկայացել:

Այսպիսով, նյութերով պարզվել է, որ 2022 թվականի հունվարի 30-ին քաղաքացի Ալի Համիդի Հագանդարի Օնգուտը մաքսային հսկողությունից թաքցնելով՝ իր կողմից շահագործվող «MAZ» մակնիշի, 93A733-10 պետհամարանիշի տրանսպորտային միջոցի խցիկի վարորդի նստատեղի ետնամասի կողային պաստառի միջից, ՀՀ մաքսային սահմանով տեղափոխել է ընդհանուր՝ 333175 ՀՀ դրամ մաքսային արժեքով ապրանք, այսինքն՝ Ալի Համիդի Հագանդարի Օնգուտը թույլ է տվել ՀՀ մաքսային օրենսգրքի 201-րդ հոդվածով նախատեսված մաքսային կանոնների խախտում, ինչը հիմնավորվում է մաքսային կանոնների խախտման վերաբերյալ արձանագրությամբ, ՊԵԿ ՀՄՎ Մեղրիի մաքսային կետ-բաժնի աշխատակցի կողմից 30"01"2022 թվականին կազմված մաքսային գննման (մաքսային տեսագննման) ակտով, Հարավային մաքսատուն-վարչության թիվ 67 և թիվ 89 մտից համարների տեղեկանքներով: Վերոգրյալի հիման վրա և ղեկավարվելով ՀՀ մաքսային օրենսգրքի 201-րդ, 206-րդ, 219-րդ, 221-րդ և 224-րդ հոդվածներով,

Ո Ր Ո Շ Ե Ց Ի՝

1. Ալի Համիդի Հագանդարի Օնգուտին (հասցե՝ ԻԻՀ, ք. Արդաբիլ, անձնագիր՝ Z46721463) ճանաչել զանցառու ՀՀ մաքսային օրենսգրքի 201-րդ հոդվածով և նրան տուգանել թաքցնելով ՀՀ մաքսային սահմանով տեղափոխված վերոնշյալ ապրանքի մաքսային արժեքի չափով՝ 333175 ՀՀ դրամի չափով:

2. Վերցված ապրանքները կարող են վերադարձվել մաքսային ձևակերպումները կատարելուց, տուգանքի վճարումից, մաքսային վճարների և պարտավորությունների կատարումից հետո՝ մեկ աշխատանքային օրվա ընթացքում:

3. ԵՏՄ մաքսային օրենսգրքի 98-րդ հոդվածի 4-րդ մասի համաձայն՝ որոշումն ուժի մեջ մտնելու օրվան հաջորդ օրվանից ոչ ուշ, քան 10 օրացուցային օրվա ընթացքում վերցված ապրանքները պետք է հանձնվեն ժամանակավոր պահպանման:

4. Որոշման մասին հայտնել Ալի Համիդի Հագանդարի Օնգուտին՝ պարզաբանելով ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

Սույն որոշմամբ նշանակված տուգանքի վճարման հաշվեհամարն է. 900005024055՝ 333175 ՀՀ դրամ, նշել 30 կողոք:

ՀԱՐԱՎԱՅԻՆ ՄԱՔՍԱՏՈՒՆ-
ՎԱՐՉՈՒԹՅԱՆ ՊԵՏԻ ԺԹՊ

ԱՐՏԱՇԵՍ ՂԱՄԲԱՐՅԱՆ